



UKA 2017/105  
03. okt. 2017  
Bendt B. Kristiansen

### **Illuliortiternernut aningaasalersuineq pillugit Inatsisartut inatsisaat nr. XX,XX XXX 2017-meersoq.**

(Kommuninut, Nunaqarfinnut, Isorliunerusunut, Attaveqaaqatigiinnermut Ineqarnermullu Naalakkersuisoq)

Naalakkersuisut namminerisamik inissialiortiternermi periarfissanik nuna tamaat ataatsimut isigalugu oqilisaassiniarnerat Inuit Ataqatigiit iluarisimaaratsigu aallarniutigalugu oqaatigilarput.

Namminerisamik illoqalerneq aningaasaqarnikkut kiffaanngissuseqarnerunermik pilersitsisarpoq, ukiullu ingerlanerini illup nalingata akileriatornerani nalilimmik pigisaqaleriatornermik kinguneqartarpoq siunissamut ileqqaarutitut taaneqarsinnaasumik aningaasatigullu kiffaanngissuseqarnermik annertusaasumik.

Isertitakinnerit akunnattumillu isertitaqqortussusillit namminerisamik initaarsinnaanermik periarfissaqartuarnissaannik Inuit Ataqatigiit pingaartitsisuvugut, taamaattumik aningaasaleeriaatsit inuiaqatigiinni eqimattani pisariaqartitsinerusunut tunaartaqartinneqartariaqartut Inuit Ataqatigiit isumaqarpugut, siunnersuummilu matumani tamanna annertuumik qulakkearniarneqarpoq, eqimattallu taakku tassaapput isertitakinnerit akunnattumillu isertitaqqortussusillit.

Sinerissami isorliunerusunilu tapiissutit qaffasissusigisinnaasaannik inissiisimaneq taperserparput, taamattaaq utoqqalinersialinnut periarfissarititaasut oqilisarniarneqarnerat tamakkiisumik taperserlutigu. Nuummi tapiissutaarukkiartortitsinissamik siunertaq eqqarsarnartoqartipparput, naak aningaaserivik ernumanartoqannginneranik oqariartoraluartoq.

Piginnittut nikinneri tamaasa kommunalbestyrelsip taarsigassarsisitsinerani taarsigassarsiat atsiorneqarnerisa angissusiata 15%-anik annertussusilimmik annikilliliisarnissaamik siunertaq nalilersorluaqqunaqaaq, qulakkearniartariaqarpoq tamanna piserusussutsimut aporfilersuilinginnissaa. Eqqarsaasersuutigineqarsinnaavortaaq 7,5-10% akornannut inissinneqassagualarpat naapertuunnerussannginnersoq.

Iluarisimaarparput allaffissornikkut marloqiusamik sullissinerup annikillinissaanik siunnersuut imaqarmat, tassalu qinnuteqartut siusinnerusukkut kommunimut aammalu Namminersorlutik Oqartussanut immikkut qinnuteqartarneringaluat piffimmut ataatsimut inissinniarneqarmat, tassalu kommuninut. Tamannalu kommunit kattussuunneqarneranni siunertat ilaat, allaffissornikillisaaneq qanillattorneqalissammat. Naatsorsuutigissavarput sullissineq assigiinnerusumik sukkanerusumillu ingerlanneqalerumaartoq.

Siunnersuutip tusarniutigineqarnerani akissuteqaataasimasut eqqarsaatigalugit pissusissamisuussaaq siunnersuutip aappassaaneeraneqannginnerani ataatsimiititaliamut susasaqartumut misissoqqissaarneqartussanngorlugu ingerlatinneqassappat.